

## Mid-Day Dogri News Bulletin, 31<sup>st</sup> May 2025

समे – 12:25

<><><><><><>

### Jammu Rail Division

रेल मंत्रालय नै घोषणा कीती ऐ जे पैहली जून 2025 थमां जम्मू इक नमां रेल डिवीजन बनी जाग जेहदा सदर मकाम उत्तर रेलवे दे तैहत्त जम्मू तवी च होग। एह नमीं डिवीजन फिरोजपुर डिवीजन च बनाया गेआ ऐ ते एहदे च पठानकोट-जम्मू-श्रीनगर-बारामुला जनेह महत्वपूर्ण रूट शामिल न। एह घोषणा 29 मई गी इक गैजेटड अधिसूचना दे राएं कीती गई ही ते 6 जनवरी गी प्रधानमंत्री नरेन्द्र मोदी होरें इस डिवीजन दा वर्चुअल रूपै कन्नै उद्घाटन कीता हा। फिरोजपुर डिवीजन दे अधिकार खेत्तर गी इस फैसले दे बाद नमें सिरेया संशोधित कीता गेआ ऐ। नमें जम्मू डिवीजन ते फिरोजपुर डिवीजन बश्कार सीमा जलंधर-पठानकोट सेक्शन ते अमृतसर-पठानकोट सेक्शन पर होंगन।

<><><><><><>

### Mock Drill Jammu

सार्वजनिक सुरक्षा ते आपात तैआरिएं च बाद्धा करने दी कोशशें दे हिस्से दे तौर पर समूलचे जम्मू संभाग च जिला प्रशासन नै आपरेशन शील्ड तैहत्त सिविल सुरक्षा अभ्यास लेई दिशा निर्देश जारी कीते न। एहदे तैहत्त अज्ज यानि 31 मई गी रातीं 8 बजे कोला लेइयै सवा 8 बजे तोड़ी ब्लैक आउट कीता जाग। समूलचे संभाग च 15एं मिंटें लेई मॉक ब्लैक आउट अभ्यास कीता जाग। रातीं 8 बजे साइरन बजने दी आवाज औने पर लोकें गी अपने घरें दियां बत्तियां बंद करी देनियां होंगन, पर्दे चाढ़ी देने होंगन ते अपनी गतिविधिएं गी रोक़ी देना होग। अजें कि इमरजेंसी सेवां आम ध्याड़े आला लेखा जारी रौंहगन।

<><><><><><>

### CEO

वरिष्ठ आईएएस अधिकारी संजीव वर्मा होरें गी जम्मू कश्मीर दा मुख् चुनां अधिकारी नियुक्त कीता गेआ ऐ। आकाशवाणी जम्मू संवाददाता नै दस्सेआ ऐ जे एजीएमयूटी काडर दे 2001

बैच दे आईएस अधिकारी संजीव वर्म होर इसलै समाज कल्याण मैहकमे दे आयुक्त सचिव दे रूपै च कम्म करा दे न। ओह पैहले जम्मू दे डिवीजनल कमीशनर ते आम प्रशासनिक मैहकमे दे आयुक्त सचिव सनें केई होर प्रमुख औहदे पर रेही चुके दे न।

<><><><><><>

### **Viksit Krishi Ramban(byte)**

रामबन जिले दे बटोत ब्लाक दे छम्पा, धर्मूड ते लधवाल पंचैत च 15एं दिनें तोड़ी चलने आले विकसित कृषि संकल्प अभियान दी शुरूआत होई। एहदा मकसद करसाने गी अज्जै कल्लै दी तकनीके राएं जागरूक बनाना ऐ। कृषि विज्ञान केन्द्र आस्सेआ लोआए गेदे केपे च राई-बाई ते सरबंधत मैहकमे दे साइंसदान ते अधिकारी शामिल होए। उनें करसाने गी राई-बाई मुत्तलक आधुनिक तकनीके ते कुदरती ढंगे कन्ने राई-बाई करने बारे जानकारी दित्ती। करसाने गी सिखलाई लेई छपे दा मटिरियल दित्ता गेआ।

<><><><><><>

### **MM Review Visit**

जम्मू स्मार्ट सिटी दे सीईओ डॉ. देवांश यादव होरे जिला प्रशासन दे अधिकारिण कन्ने रलियै ऐतिहासिक मुबारक मंडी परिसर दा दौरा लाया ते विरासती लायब्रेरी ते कैप्टेरिया सनें जारी विकास कम्मे दा मुआयना कीता। इस दौरे दा मकसद जम्मू दी सगोसार, संस्कृति ते विरासती पंछान गी बनाए रखने दे कन्नोकन्नी जारी बाद्धे विकास कम्मे दा व्यापक जायजा लैता हा। अधिकारिण आस्सेआ खित्ते च विरासती सैलसफा गी बढ़ावा देने दे उपाएं बारे चर्चा बी कीती गई। एह पैहलकदमी स्मार्ट सिटी मिशन तैहत जारी व्यापक जतनें दा इक हिस्सा ऐ।

<><><><><><>

### **DC Udhampur**

उधमपुर दियां डिप्टी कमीशनर सलोनी राय होरे मिनी कांफ्रेंस हाल च डीसी दफ्तर परिसर च इक बैठक दी अध्यक्षता कीती जेहदे च शिड़क हादसे दे शिकार लोकें दिएं जरूरतें गी पूरा करने पर ध्यान दित्ता गेआ। इस दरान कमेटी नै शिड़क हादसे दे शिकार लोकें गी मुआवजा

देने सरबंधी 5 मामलें गी मंजूरी देई दित्ती। डीसी होरें सरबंधत अधिकारिएं गी निर्देश दित्ता जे ओह प्रभावत परोआरें गी समें पर मुआवजा देना जकीनी बनान। उनें यात्रुएं दी सुरक्षा ते यातायात सरबंधी नियमें दी पालमा जकीनी बनाने लेई सख्त निगरानी बनाई रखने दी लोड़ पर बी जोर दित्ता।

<><><><><><>

## Weather

तेज ब्हाएं दे कन्नै बरखा नै अज्ज जम्मू खित्ते दे केई थाहरें गर्मी शा राहत दित्ती ऐ। मौसम विभाग नै अज्ज बक्ख-बक्ख थाहरें पर दरम्याने कोला भारी बरखा, अंधी झक्खड़ ते तेज ब्हाएं दी चेतावनी जारी कीती ऐ। नागरिकें गी सावधानी बरतने दी सलाह जारी कीती गेई ऐ की जे भारी बरखा कन्ने किश इलाकें च चानचक्क हाड़ आई सकदा ऐ। मते संवेदनशील इलाकें च ल्हास पस्सियां पौने दी बी शैंका जताई गेदी ऐ। बसनीकें गी चौकस रौहने, सुरक्षा दिशा निर्देशें दी पालमा करने ते इस दरान अपनी सुरक्षा सुनिश्चित करने आस्तै मौसम बारे ताजा जानकारी हासल करदे रौहने दी सलाह दित्ती गेई ऐ।

<><><><><><>

## Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओह कठुआ जिले दा रौहने आहला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी जम्मू कश पंजीतीर्थी 15 जून 2025 थवां पैहले-पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट [www.newsonair.gov.in](http://www.newsonair.gov.in) पर उपलब्ध ऐ।

<><><><><><>